

In mais da pais

Las lingias grassas e finas dal mars 2021

DAVID TRUTTMANN/FMR

Terrassas vidas, però ina cassa plaina tar il chantun. Las stgas d'ustaria restan libras, la sedia episcopala a Cuirà è percenter puspè occupada. Vid u plain? Liber u occupà? Quai èn stadas las dumondas principalas da quest mais.

Ina pagina plaina en La Quotidiana è stada deditgada a Leo Tuor. Dacurt ha gea il chantun communitgà che l'autur sursilvan survegnia il premi da cultura dal Grischun, dotà cun 30 000 francs (statal). Ed en l'intervista ha il provocatur Leo Tuor sa chapescha giugà cun tut las provocaziuns pussaivlas, cun bunas e main bunas, cun Indermaurs e «grippas chinasas». L'autur rumantsch, documentalist, anteriur pastur ed anteriur scolast ha gist era ditg tge ch'el manegia da subvenziuns e contribuziuns statals: «Subvenziuns mazzan l'economia, surtut la fantasia.» È quai propi uschia? U dumandà auter: Tge professiuns vegnan atgnamain finanziadas principalmain cun subvenziuns? – Quai èn tranter auter scolasts, pasturs, documentalists e litterats rumantschs. Damai persunas sco Leo Tuor. E tut quellas subvenziuns n'han gea mai gi effects negativs sin la fantasia da Leo Tuor. Anzi e per fortuna.

In tempet n'era l'uffizi betg occupà. Però ussa ha la Val Alvra in nov plevon. E quel nov plevon ha in num sco or dad in italo-western: *Don Federico Pelicon*. Cun ses antecessur avevi gea dà istorgias. Vul dir, igl aveva dà dispita e discordia tranter ils gremis da la plaiv e l'antierur plevon, il qual era però detg apprecià tar parochianas e parochians. Igl era bunamain in pau sco tar las dispitas en la cumedia taliana da Don Camillo e Peppone. Facit: La plaiv en Val Alvra ha midà ussa dad ina cumedia taliana tar in italo-western. Il titel pudess esser: *Don Federico Pelicon* ed ils set crettaivels.

«La PCD e la PBD preparan lur nozzas (mo civil!)»

Bainbaud betg pli libers! Ducas grondas partidas grischunas vulan numnadamain maridar. La PCD e la PBD preparan lur nozzas (mo civil!) ed han perquai lantschà quest mais ina retschertga tar ils commembers da partida. A nivel nazional han las duas partidas gia fatg spus a l'Allianza dal Center (AdC). Grischunas e Grischuns han mussà enfin ussa pauc svung, ussa para l'amur da crescher. Però co numnar il pop? Apparentamain



ILLUSTRAZIUN JON BISCHOFF

datti vuschs da Zernez e conturn che vulessan in auter num enstagdad AdC. Els preferissan ch'i dess or da PCD e PBD da nov la «PCB». Per finalmain rabitschar davent quest tissi or dal Spöl.

Occupà la piazza da scola? Chausas incrediblas èn numnadamain capitadas a Scuol la notg da glindesdi sin mardi, ils 8 sin ils 9 da mars 2021. Da stgira notg, a las 01.30, eran anc 190 persunas en gir enturn la chasa da scola. Las bleras scutinavan ed avevan si maschina. Sco ch'i para era la polizia communal cumplettaimain surdumandada. Tge era capità? Ina demonstraziun? In flashmob? Avevan els la lubientscha? – A la fin ha il capo communal *Christian Fanzun* pudì sclerir la chausa: Suentar tschintg uras debattas davart credits e la punt da Gurlaina era gist vegnida terminada la radunanza communal. A las 01.30 la notg.

Dad occupar fitg bain tuttas stanzas, quai è la finamira dals novs possessurs da l'Hotel

Vallatscha a Curaglia. L'antierur cumpossessur ed anteriur president communal, *Peter Binz*, è satisfatg da pudair dar il pop en novs mauns. Quai ch'è interessant: Ils dus novs gestiunaris han senza dubi las meglras premissas per manar in pitschen hotel en ina vallada muntagnarda e periferica ch'ha in u l'auter problemin demografic, sco la Val Medel. Pertge? – *Mila Gildenhorn* ha lavurà en ina residenza

«En scola dumandass la scolasta: «Tgi ha scrit giu da tgi?»»

da seniors. Ses um *Daniel Gildenhorn* ha lavurà en il sectur da finanzas. Finanzas e seniors – ideal per enta Medel.

Plain svung han ils cussegliers nazionals *Martin Candinas* (PCD) e *Sandra Locher-Benguerel* (PS) gizzà il cuntè. Tuts dus han cumbatti per in GEA u NA tar la e-ID, la lescha per ina «carta» d'identidad virtuala, la quala è alura vegnida sbittada quest mais. La FMR ha laschà scriver als dus parlamentarists grischuns lur pro e contra. Interessant è ch'il text da Candinas, ch'era per la e-ID, cumenza uschia: «Adina dapli fatschentas e survetschs vegnan liquidai a moda digitala.» Ed il text da Locher-Benguerel cun la posiziun cuntraria entschaiva uschia: «Adina dapli fatschentas vegnan liquidadas en l'internet.» Traplà! En scola dumandass la scolasta: «Tgi ha scrit giu da tgi?»

La libertad artistica ha cunfins. L'Schon puspè ha dà da discutir in maletg en ina baselgia sursilvana. Questa giada betg a Breil, mabain a Laax. Entant ch'i va a Breil per simbols e Scientology, èi anc ina crenna pli delicat a Laax. I va per ina gronda ovra d'art ch'era exponida davant l'altar principal en la baselgia. L'ovra da l'artista

Anna Rita Stoffel mussa en format grond la siluetta dad in u da dus corps umans. Tenor l'artista èi ina «skizza innocenta». Per la plaiv eri dentant «ina provocaziun erotica». Il maletg è ussa vegni allontanà e penda vi dad in clavà. La quintessenza da quest'entira istorgia: A Laax è sa manifestada ina da las grondas tensiuns en l'istorgia da la morala da l'umanità: «erotica» encunter «innocenza». Ed anc insatge emprendain nus: clavads taschan.

E tge ha uschiglio anc occupà ed Emplenì las paginas en gasetta? Quest mais è cumpari in nov game da computer en lingua rumantscha: «Mundaun». Probabel procura quel per dapli reclama per la lingua rumantscha che la «Emna rumantscha» da cusseglier federal *Ignazio Cassis*.

«Il tschierv vuleva participar a l'ensemble da Giovanni Netzer»

Tuttas e tuts fan bunas speranzas sin in prosperaivel avegnir – grazia ad in nov uvestg da Cuirà e grazia a novs possessurs da l'Institut otalpin a Ftan. Bun, en tuts dus cas èn vegnidas fatgas gia varsaquantas giadas bunas speranzas per in avegnir prosperaivel. Cun il resultat ch'ins spera anc adina.

Sco la FMR ha rapportà dacurt han passantas e passants vis a Riom in tschierv chapital che fasscheva la siesta vi dal mir da la Clavadeira, la sala da teater dad Origen. Pertge quai? I dat duas decleraziuns pussaivlas. Primo: Il tschierv vuleva participar a l'ensemble da Giovanni Netzer. La segunda varianta: *Giovanni Netzer* è sa vestgì sco tschierv per finalmain avoir paus da microfons e cameras che al persequiteschan tar mintga pass tras Riom e Mulegns.

Insumma, i dess anc blier da rapportar da quest mais. Ma la pagina è plaina.

Il mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en il Grischun ed insumma? Quai sa dumonda la redacziun da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista casuala e commentain quai cun in surrir. Mais per mais illustrescha il Bregagliot rumantsch *Jon Bischoff* il «mais da pais» cun in schurnal grafic.